

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренијси савјет

MIŠLJENJE

**po zahtjevu Advokatskog društva dmb legal,
društvo sa ograničenom odgovornošću Sarajevo**

**Sarajevo,
septembar 2020. godine**



Broj: 01-26-7-010-2/20
Sarajevo, 23.09.2020. godine

Na osnovu člana 25. stav (1) tačka f) Zakona o konkurenciji ("Službeni glasnik BiH", br. 48/05, 76/07 i 80/09), a po Zahtjevu Advokatskog društva dmb legal, društvo sa ograničenom odgovornošću Sarajevo, Kralja Tvrtka br. 6, 71000 Sarajevo, zaprimljenom dana 04.08.2020. godine pod brojem: 01-26-7-010-1/20, Konkurencijsko vijeće Bosne i Hercegovine na 73. (sedamdesettrećoj) sjednici održanoj dana 23.09.2020. godine, donijelo je

MIŠLJENJE

Advokatsko društvo dmb legal, društvo sa ograničenom odgovornošću Sarajevo, Kralja Tvrtka 6, 71000 Sarajevo (u daljem tekstu: Podnosilac zahtjeva), podnijelo je Konkurencijskom vijeću Bosne i Hercegovine (u daljem tekstu: Konkurencijsko vijeće) Zahtjev za izdavanje mišljenja, zaprimljen dana 04.08.2020. godine pod brojem: 01-26-7-010-1/20 (u daljem tekstu: Zahtjev).

Zahtjevom se traži mišljenje o obavezi prijave transakcije u smislu člana 12. stav (1) i člana 14. stav (1) Zakona o konkurenciji (u daljem tekstu: Zakon).

U Zahtjevu se u bitnom navodi sljedeće:

- Transakcija predviđa kupovinu 100% udjela u društvu sa ograničenom odgovornošću sa sjedištem u Sarajevu (u daljem tekstu: ciljno društvo), koje je trenutno u vlasništvu stranog pravnog lica. Ciljno društvo se bavi upravljanjem imovinom u BiH.

- Kupci 100% udjela u ciljnom društvu su dva fizička lica, od kojih je jedno državljanin BiH, a drugo strani državljanin sa prebivalištem izvan BiH (u daljem tekstu: kupci). Kupci nisu vlasnici niti jednog drugog društva u BiH ili inostranstvu, niti na bilo koji drugi način učestvuju na tržištu roba i usluga sa izuzetkom redovnog radnog odnosa, odnosa zaposlenja kod poslodavca.

- Ukupni godišnji prihod ciljnog društva u 2019. godini ostvaren prodajom usluga na tržištu BiH prešao je iznos od 8.000.000 KM po završnom računu iz predhodne godine. Učešće Ciljnog društva na relevantnom tržištu je manje od 5%. Ciljno društvo nije ostvarilo prihod na tržištima izvan BiH. S druge strane, kupci nisu ostvarili prihod na tržištu BiH, osim prihoda iz redovnog radnog odnosa, koji je svakako ispod iznosa od 8.000.000 KM.

- Podnosilac zahtjeva smatra da s obzirom na navedene činjenice nisu ispunjeni uslovi da se namjeravana transakcija smatra koncentracijom u smislu člana 12. stav (1) Zakona, budući da se kupci ne mogu smatrati privredni subjektima u smislu člana 2. stav (1) Zakona.

- Podnosilac zahtjeva smatra da čak i ako bi Konkurencijsko vijeće zauzelo stav da se namjeravana transakcija smatra koncentracijom, ista ne ispunjava uslove za obavezu prijave propisane članom 14. stav (1) Zakona, odnosno da učesnici koncentracije neispunjavaju uslov prihoda niti na svjetskom niti na BiH tržištu, kao i da njihovo zajedničko učešće na relevantnom tržištu nije veće od 40%.

- Podnosilac zahtjeva traži od Konkurencijskog vijeća da potvrdi ovakav stav, odnosno da se izda mišljenje da li su se u opisanoj situaciji stekli uslovi za prijavu transakcije Konkurencijskom vijeću.

Postupajući po Zahtjevu, Konkurencijsko vijeće je analiziralo i procijenilo sve relevantne činjenice koje su u njemu navedene, kao i propise koji to regulišu.

Prilikom izrade mišljenja Konkurencijsko vijeće se koristilo odredbama člana 12. stav (1) i člana 14. stav (1) Zakona, kao i odredbama člana 2. Odluke o načinu podnošenja prijave i kriterijumima za ocjenu koncentracija privrednih subjekata ("Službeni glasnik BiH", br. 34/10) (u daljem tekstu: Odluka).

Određbe člana 12. stav (1) Zakona glase:

"(1) Koncentracijom, u smislu ovog zakona, smatra se:

- a) spajanje ili pripajanje nezavisnih privrednih subjekata ili dijelova privrednih subjekata;*
- b) sticanje kontrole ili prevladavajućeg utjecaja jednog, odnosno više privrednih subjekata nad drugim, odnosno nad više drugih privrednih subjekata ili dijelom drugog privrednog subjekta, odnosno dijelovima drugih privrednih subjekata, i to:*
 - 1) sticanjem kupovinom većine dionica ili udjela osnovnog kapitala; ili*
 - 2) sticanjem većine prava glasa; ili*
 - 3) na drugi način, u skladu s odredbama zakona koji regulišu osnivanje privrednih subjekata i njihovo upravljanje;*
- c) zajedničko ulaganje na dugoročnoj osnovi, dva ili više nezavisnih privrednih subjekata, koji djeluju kao nezavisan privredni subjekt."*

Određbe člana 14. stav (1) Zakona glase:

"(1) Namjeravanu koncentraciju privrednih subjekata, iz člana 12. stav (1) ovog zakona, učesnici koncentracije su obavezni prijaviti, i to kada su ispunjeni sljedeći uslovi:

- a) da ukupni godišnji prihod svih učesnika koncentracije ostvaren prodajom roba i /ili usluga na svjetskom tržištu iznosi 100.000.000 KM po završnom računu u godini koja je prethodila koncentraciji; i*
- b) da ukupni godišnji prihod svakog od najmanje dva privredna subjekta učesnika koncentracije ostvaren prodajom roba i /ili usluga na tržištu Bosne i Hercegovine iznosi najmanje 8.000.000 KM po završnom računu u godini koja je prethodila koncentraciji, ili ako je njihovo zajedničko učešće na relevantnom tržištu veće od 40%."*

Određbe člana 2. Odluke, kojima se pojašnjava član 14. stav (1) Zakona glase:

"Namjeravanu koncentraciju privrednih subjekata iz člana 12. Zakona, učesnici koncentracije su obavezni prijaviti i to:

- a) privredni subjekti sa sjedištem i prebivalištem u inostranstvu ukoliko su ispunjeni uslovi iz člana 14. tačke a) i b) Zakona, i*
- b) privredni subjekti sa sjedištem i prebivalištem u Bosni i Hercegovini ukoliko su ispunjeni uslovi iz člana 14. tačka b) Zakona."*

Konkurencijsko vijeće smatra da transakcija koja je opisana u Zahtjevu, a koja se odnosi na to da fizička lica, kao kupci 100% udjela u neimenovanom društvu sa ograničenom odgovornošću sa sjedištem u Sarajevu, nisu vlasnici niti jednog drugog društva u BiH ili inostranstvu, niti na bilo koji drugi način učestvuju na tržištu roba i usluga, ne sadrži dovoljan broj podataka da bi se sa sigurnošću moglo govoriti o tome da se u predmetnom slučaju ne radi o koncentraciji.

Članom 12. stav (1) Zakona propisano je da koncentracija može biti samo između privrednih subjekata. Međutim, ovo ne znači da koncentracija ne može nastati na način da fizička lica kupovinom većine udjela u određenom privrednom subjektu steknu kontrolu nad istim.

Transakcija koju Podnosilac zahtjeva opisuje ne bi se smatrala koncentracijom samo u slučaju da kupci nemaju značajan uticaj ili kontrolu, bilo pojedinačnu ili zajedničku, nad privrednim subjektom ili subjektima, koji mogu biti učesnici u koncentraciji sa ciljnim društvom.

Što se tiče dijela Zahtjeva koji se odnosi na obavezu prijave transakcije kada bi se ista posmatrala kao koncentracija, Konkurencijsko vijeće smatra da bi obaveza prijave postojala samo ako su ispunjeni propisani uslovi, na način kako je to navedeno u članu 14. stav (1) Zakona, a vezano za to i članu 2. Odluke.

Uslovi za obavezu prijave transakcije koji su propisani u članu 14. stav (1) Zakona odnose se ukupan prihod privrednih subjekta koji učestvuju u koncentraciji, ostvaren u godini koja je predhodila koncentraciji i njihovo zajedničko učešće na relevantnom tržištu. Shodno tome, da bi se uopšte razmatrali uslovi za obavezu prijave koncentracije, ukupan prihod učesnika u koncentraciji i učešće na relevantnom tržištu moraju se odnositi na privredne subjekte koji učestvuju u koncentraciji, ali ne i na fizička lica.

Ovo mišljenje je dato isključivo na osnovu podataka dostavljenih u Zahtjevu, te ukoliko dati podaci odstupaju od stvarnog činjeničnog stanja ovo mišljenje se ne može primijeniti.

Predsjednik

dr. Stjepo Pranjić